



# 7

Niining Leksyona Matun-an Mo kini

Si Jesus ug ang Iyang mga Igsoon

Si Jesus sa Fiesta sa mga Payag

Siya ba ang Mesias?

Gipadala ang mga Polis aron Pagdakop  
Kang Jesus

Mga Sapa sa Tubig nga Buhi

Ang Mga Tawo Nagkasumpaki

Ang dili Pagkamatinoohon sa mga Pangulo  
sa Judeo

## SI JESUS UG ANG IYANG MGA IGSOON

(Basaha ang Juan 7:1-9)

Kining mao nga hugna nagahisgut mahitungod sa nagkalainlaing panghunahuna sa mga tawo mahitungod kang Jesus. Dunay uban nga dili buot nga motoo Kaniya. Ang uban nagbaton sa ilang kaugalingong mga prinsipyo nga wala mohaum sa mga ginatudlo ni Jesus. Ug ang uban usab naglagot Kaniya tungod kay nagwali Siya batok sa mga dautang butang nga gibuhat sa mga katawhan.

Sa samang higayon usab ang kaugalingong mga igsoon nga lalake ni Jesus wala motoo nga Siya mao ang Mesias o Cristo. Apan sa kaulahian mitoo ra sila. Daghan sa mga kaaway ni Jesus ang mitoo Kaniya sa dihang nabanhaw na Siya. Ug ang uban niadtong mga katawhan nga mga kaaway sa ebanghelyo mahimong modawat ra Kaniya kon magaampo kita alang kanila. Nagtudlo si Jesus sa Iyang mga tinun-an sa paghigugma sa ilang mga kaaway ug sa pag-ampo alang kanila.

### Buhata Kini

1. Aduna ka bay kaila nga nasilag sa ebanghelyo?  
..... Pag-ampo alang kaniya.
2. Tanan na ba sa imong mga igsoong lalake ug igsoong babaye nagtoo ug nagdawat kang Jesus? ..... Pag-ampo usab alang kanila.

**SI JESUS SA FIESTA SA MGA PAYAG****(Basaha ang Juan 7:10-24)**

Sa makapito niining capituloha gisultihan kita nga si Jesus anaa sa makuyaw nga dapit. Basaha ang mga bersikulo 1, 13, 19, 25, 30, 32, 44. Apan bisan pa sa maong kakuyaw, nagpadayon si Jesus sa pagpanudlo ug miadto pa gayud sa fiesta sa Jerusalem. Daghan sa mga sumusunod ni Jesus karong panahona anaa sa makuyaw nga dapit. Busa kinahanglan nga magaampo kita sa Dios nga hatagan sila ug kaisug sa pagpadayon sa pagpanudlo, pagwali, ug pagsugid mahitungod kang Jesus.

Ang mga pagtulon-an ni Jesus nakapatingala sa mga Judio. Nasayud sila nga si Jesus wala makatuon sa ilang mga mataas nga mga tunghaan. Ang mga kamatuoran nga Iyang gipanudlo nagagikan sa Dios.

Basaha ang bersikulo 17. Kon kita magamasinugtanon sa buot ipabuhar sa Dios kanato, Siya magapasabot kanato sa kamatuoran. Kadaghanan sa mga tawo nga dili motoo sa ebanghelyo aduna niining mao nga suliran. - ang suliran sa dili pagpakaila sa kamatuoran tungod kay dili siia buot motuman sa Dios. Bisan kadtong mga tawo nga wala motoo nga dunay Dios mahimong makakaplag Kaniya pinaagi sa kinasingkasing nga pag-ampo, nga ingon niini, "Ginoo kon adunay Dios, kon malooy ka ipadayag ang imong kaugalingon nganhi kanako. Pasabta ako sa kamatuoran ug mosunod ako kanimo.

Dihay ubang mga katawhan nga nagbagulbol tungod kay si Jesus nagpang-ayo man sa mga masakiton bisan sa adlaw nga Sabado. Usahay ang usa ka balaod daw nahasupak sa laing balaod. Kon kini mahitabo man ugaling, nagtudlo si Jesus nga kinahanglan tumanon ta ang labing maayo o labing mahinungdanon. Pananglitan ang balaod naga-ingon nga dili gayud magabuhat o magatrabaho sa adlaw nga Sabado. Apan duna usay giingon sa balaod nga ang batang lalake kinahanglan sirkunsisyonan sa ikawalo nga adlaw. Nan kon ang ika-walo nga adlaw mahitabo sa Sabado, sa ato pa nasupak na ang mga katawhan sa balaod mahitungod sa sirkunsisyon. Nanudlo si Jesus nga ang balaod nga makaayo sa uban labawng importante kay sa balaod sa Sabado.

#### Buhata Kini

3. Nganong maayo man kaayo ang mga pagtulunan ni Jesus?
  - . . . a) Tungod kay nakatungha man Siya sa mataas nga mga tunghaan.
  - . . . b) Tungod kay ang mga Fariseo ug mga pari mao ang Iyang mga magtutudlo.
  - . . . c) Tungod kay ang Iyang gipanudlo nagagikan man sa Dios.
4. Pag-ampo alang sa imong mga higala nga wala pa maluwas nga ang Dios magahatag kanila ug higayon sa pagbiya sa ilang mga sala aron makasabot sila sa kamatuoran sa ebanghelyo.
5. Pag-ampo alang niadtong anaa sa makuyaw nga mga dapit tungod sa ilang pagsunod kang Jesus.

**SIYA BA ANG MESIAS?****(Basaha ang Juan 7:25-31)**

Nangahibulong ang mga katawhan sa pagkalkita nila kang Jesus nga nanagpanudlo didto sa templo tungod kay nasayud sila nga ang Judio nagpangita Kaniya aron ilang patyon. Apan dili sila makahimo sa pagpatay Kaniya hangtud nga dili pa moabot ang panahon nga **gitagana** sa Dios alang sa Iyang kamatayon. Nasayud si Jesus nga ipadala Siya sa Dios ug nga ang Dios magatabang Kaniya sa pagtapus sa Iyang buluhaton. Busa si Jesus nagpadayon sa pagpanudlo didto sa templo. Tungod kay Siya dunay kaisug sa pagbuhat sa buot ipabuhat sa Dios Kaniya. Ug daghan pang mga katawhan ang mitoo Kaniya ug nangaluwas gikan sa ilang mga sala.

**Buhata Kini**

Sulati ang mga blangko

6. Unsa may buot buhaton sa mga Judio ngadto kang Jesus? .....
7. Kinsa man ang nagpadala kang Jesus? .....
8. Sayon ba kanunay ang pagbuhat sa buot ipabuhat sa Dios kanimo? .....
9. Kinsa man ang magabantay kanimo? .....



**GIPADALA ANG MGA POLIS ARON  
PAGDAKOP KANG JESUS  
(Basaha ang Juan 7:32-36)**

Ang kamatuoran nga daghan sa mga tawo ang mitoo kang Jesus naka-padasig sa mga Fariseo sa pagpaningkamot sa pagpatay Kaniya. Nasayud si Jesus nga ilang patyon Siya kay mianhi man Siya sa kalibutan aron magpakamatay alang sa atong



mga sala. Naghisgut Siya mahitungod sa Iyang kamatayon ingon nga usa ka pag-adto sa usa ka dapit diin dili makasunod Kaniya ang mga katawhan. Matapus ra unya ang Iyang buluhaton ug mobalik Siya ngadto sa langit uban sa Dios nga Iyang Amahan. Kadtong nanagsunod kang Jesus moadto sa langit human sa ilang kamatayon.

**Buhata Kini**

10. Giunsa man nato pagkahibalo nga dunay mga kaaway si Jesus?
- . . . a) Tungod kay ang mga kadagkuan sa kaparian buot mopatay Kaniya.
  - . . . b) Ang gobernador nga Romanhon nagpadakop kang Jesus.
  - . . . c) Ang mga katawhan buot mopatay kang Jesus.

## MGA SAPA SA TUBIG NGA BUHI (Basaha ang Juan 7:37-39)

Miingon si Jesus, "Kon adunay tawong giuhaw umari siya Kanako ug uminom." Natun-an na nato nga gipakasama ni Jesus ang kaluwasan sa tubig nga buhi. Apan Ang bersikulo 39 nagpahayag nga ang tubig nga Iyang giingon nagpasabot sa Espiritu Santo. Ug kini ihatag sa magtotoo human siya modawat kang Jesus. Human mapasaylo ang tawo gikan sa iyang mga sala, kinahanglan nga magtinguha siya nga mapun-an sa Espiritu Santo. Ang basahon sa mga Buhata, atong makaplagan nga ang mga magtotoo nangapun-an sa Espiritu Santo human nila madawat si Jesus ingon nga ilang Manluluwas.

### Buhata Kini

11. Sa dihang miingon si Jesus, "Kon adunay tawong giuhaw umari siya kanako ug uminom," unsa may iyang gipasabot?
- . . . a) Mahitungod sa kaluwasan nga Iyang ginganlan ug tubig nga buhi.
  - . . . b) Mahitungod sa Espiritu Santo nga ihatag ngadto sa mga magtotoo human sila mamaluwas.
  - . . . c) Mahitungod sa tubig gikan sa suba sa Jordan.

## ANG MGA TAWO NAGKASUMPAKI (Basaha ang Juan 7:40-44)

Ang mga katawhan sa panahon ni Jesus adunay nagkalainlaing pagsabot mahitungod kang Jesus sama usab sa atong panahon karon. Husto sila nga nanagingon nga si Jesus mao ang Propeta nga gisaad sa Dios, ang Mesias, ug ang Anak sa Dios.

Nagpuyo si Jesus sa lalawigan sa Galilea apan didto Siya matawo sa Bethlehem Si Lucas ug si Mateo naghatag kanato ug mga lista sa mga katigulangan ni Jesus. Gipakita nila nga si Jesus kaliwat ni David, ug nga si Jesus mao ang katumanan mahitungod sa panagna nga Mesias.

### Buhata Kini

Sulati ang mga blangko.

12. Matud sa mga katawhan asa man matawo ang Mesias? \_\_\_\_\_
13. Asa man natawo si Jesus?  
\_\_\_\_\_
14. Kaliwat ba si Jesus ni DAvid?  
\_\_\_\_\_



ANG DILI PAGKAMATINOHA ON SA NGA  
PANGULO SA JUDIO  
(Basaha ang Juan 7:45-52)

Buot ang mga Fariseo nga madakop si Jesus. Apan miingon ang usa ka polis nga, “wala pa gayuy tawo nga nakasulti sama niining tawhana”! Wala gayuy nakasulti nga sama kang Jesus tungod kay Siya Dios man. Kinahanglan nga tun-an ta ang mga butang nga gipanudlo ni Jesus labaw pa kay sa mga gipanulti sa mga katawhan.

Buhata Kini

15. Unsa may gisulti sa usa ka polis mahitungod kang Jesus?
  - . . . a) “Wala pa gayuy tawo nga nakasulti sama niining tawhana”
  - . . . b) “Walay propeta nga magagikan sa Galilea.”
  - . . . c) “Naunsa bang may hikatonan man kining tawhana nga unta wala man makatungha?”
16. Itandi ang imong mga tubag sa hustong mga tubag nga anaa sa katapusan niining leksyona.
17. Sulati ang imong rekord sa estudyante alang sa ika-4 nga leksyon.

## Mga Tubag Sa Ika-7 nga Leksyon.

Kon duna kay 11 ngadto sa 12 ka mga hustong tubag, markahi ug labing maayo ang imong grado; kon 9 ngadto sa 10, markahi ug maayo. Kon 7 ngadto sa 8, kasarangan. Ug kon ubos sa 7 ang imong hustong tubag, basaha pag-usab ang leksyon.

3. c) Tungod kay ang Iyang gipanudlo nagagikan man sa Dios.
6. Patyon Siya.
7. Ang Dios.
8. Dili.
9. Ang Dios
10. a) Tungod kay ang mga kadagkuan sa mga kaparian buot mopatay Kaniya.
11. b) Mahitungod sa Espiritu Santo nga ihatag ngadto sa mga magtotoo human sila mamaluwas.
12. Bethlehem.
13. Bethlehem.
14. Oo.
15. a) "Wala pa gayuy tawo nga nakasulti sama niining tawhana! "

Gidaghanon sa Hustong Tubag \_\_\_\_\_

Grado \_\_\_\_\_